

4. 20. 133
235. 2018

LA HARANGVE D'ACHIOR L'AM- MONITE SVR VN ADVIS DONNE A MONSEIGNEVR LE PRINCE.

Prononcée apres celle d'Alexandre le Forgeron.

*Achior le Duc de tous les fils d'Ammon, dit. Monsei-
gneur s'il te plaist de m'escouter ie diray la verité en
ta presence & ne sortira point vne fausse parolle de
ma bouche. Iudith. 5.*

M. D C. XIII.

Cass
F
39
1326
161422
ALEXANDRE le Forgeron ayant ainsi parlé, il n'y eut personne en la compagnie qui ne se regardast l'un l'autre, & sembloit que la bouche de Iupiter fut tombee dans l'estang des Grenouilles qui vouloient changer l'estat de leur Republique. Tout le monde se teust, & combien que l'attention eust esté grande durant ceste notable harangue, si remarqua-on vn silence particulier & fort extraordinaire apres qu'elle fust acheuee. Chacun iugeoit à part soy que pour auoir mal enfourné, les pains deuiendroient cornus, & ce silence Pythagorique estoit pour tenir d'auantage l'assemblée en estonnement, si vn certain fendeur de nazeaux qui estoit hors de rang, n'eust perdu le respect qu'il deuoit à ses maistres, par vn sang-Dieu qu'il cracha contre Monsieur le haragueur, luy disant, Que c'estoit l'homme qui auoit le plus grand tort du monde, & que c'estoient de ses tours ordinaires d'embrouiller les autres, & puis de retirer son espingle du ieu quand les affaires s'acheminoient mal. Cest homme qui estoit plein de fougue en eust dit dauantage, & sans doute eust acheué de lauer la teste à Monsieur le Forgeron, si le Conclau ne s'en fust esmeu, & ne luy eust commandé de se taire. Toutesfois chacun ne laissa point d'en dire la sienne, & n'y auoit personne en la compagnie qui ne iugeast bien d'auoir esté surpris & leurré par ce vieux double de Maistre des Forges: dont chacun commença de le regarder de trauers, luy souhaittant que puis qu'il faisoit si mal ses affaires, il en demeurast eternellement constipé. Mais luy qui scait aussi bien se desbrouiller comme il brouille les autres, s'aduisa d'une ruse pour s'arracher de ce borbier, &

tira de sa pochette vn escrit composé par l'Aduocat de la sainte Reformation, qui portoit ce til-tre. *Auis à Monseigneur le Prince.* Il le luy bailla, & luy dit. Monseigneur, vostre Excellence ne doit point s'ebahir du langage que i'ay tenu, ny vous autres Messieurs entrer en ombrage de mes actions, qu'un chacun sçait auoir tousiours esté portees à l'vtilité de chacun de nous & de moy en particulier. Je vous iure sur ma foy, que i'ay aussi bonne enuie de faire parler de moy, qu'aucun de vous: mais ie voy que nostre cas va mal, & que si nous passons plus outre, nous trouuerons tant de perils & d'inconueniens, qu'il nous faudra retourner d'où nous sommes venus, (si on nous le permet,) ou apprendre à danser la volte, que l'on nomme le sault de Breton. Si faut-il pourtant en sortir à nostre honneur: or en voicy vn moyen le plus beau du monde, qu'un de mes seruiteurs m'a enuoyé de Paris. C'est vn aduis d'extreme consequence, car si celuy qui le propose le peut vne fois prouuer en Barbara, nous voila tous riches à iamais; il n'y aura personne de nous qui n'ait vn beau bonnet de Duc ou de Comte sur la teste. Il est bien vray que nous en auons des-ja, Dieu mercy, mais ie trouue que ceux de Brabant, Luxembourg, Gueldres, Lembourg, Flandres, Artois, Hainau & Namur sont plus chauds que les nostres, & de bien plus grande valeur. Qui sçait si puis apres nous ne conquerons pas aussi la Hollande, Zelande, Zutphen, Querissel, Frise & Groningue? Nauons-nous pas avec nous la fleur des soldats Valons qui nous seruira d'Ange Raphaël en ce pays-là? Courage, Messieurs, ce benoit donneur d'aduis nous alleu-

re que le liēt de l'Archiduc mourra bien tost, & de plus, qu'il a compté avec le Roy d'Espagne, & veu le fonds de ses coffres. Courage, Messieurs, c'est vne belle entreprise, & à laquelle vous deuez songer, mais auant tout, prenons du Roy autant d'argent & de Villes que nous pourrons, pour le seruice que nous luy auons faict, d'auoir eu soin du public en postposant nostre interest particulier. Or pour vous tesmoigner quel ambition ne m'estrange pas, comme veulent croire mes freres en Christ, Je vous iure sur les diues Euangiles de ma saincte Reformation que ien'y pretens aucune chose, mais vous laisseray aller en la garde de Dieu faire ceste cōqueste, pendant laquelle ie feray prier aux Eglises de nostre parroisse que vous puissiez m'y acquerir quelque piece qui soit de la bien-seance de ma souueraineté, sans que vous rencontriez de si mauuais hostes que le feu sieur de Genlis qui perdit bottes & esperons à Hautrage, voulant secourir le Comte Ludouic qui auoit surpris Mons en Hainau. Il eust dit, & soudain vn trouble s'esmeut dans la salle pour voir ce notable aduis qui fut veu & receu avec beaucoup de plaisir, chacun du commencement se promettant quelque lopin, & discourant sur la maladie de l'Archiduc, & la necessité imaginaire du Roy d'Espagne. Mais en fin, quand tout eust esté bien examiné, les plus vieux virent bien qu'il y auoit en cela plus à faire qu'à dire, & que iusques là ils auoient fait les conquestes de Picrocholme en Rabelais. A ce propos, pendant que ces Messieurs s'empeschoient autour de ce diuin aduis, le venerable Forgeron tesmoigna bien qu'il n'en auoit pas d'autre opinion,

car vn de ses confidens qui estoit derriere luy, luy ayant dit à l'oreille. Monsieur vous proposez là vne grande expedition, trouuez vous donc la matiere si bien preparee? Laissez moy faire, luy respondit il, ce m'est assez qu'ils ayēt cela en teste, & que i'en vuide à mon honneur, du reste il ne m'en chaut. Comme il discouroit avec ce sien amy, l'assemblée se demenoit estrangement autour de ce superlifique aduis, & lors y eut vn vieux & sage Cheualier bien experimenté aux armes, qui s'aduança sur le bruit que l'on faisoit d'aller conquerir la Flandre: Il se mit au milieu de la troupe branlant la teste & secouant les espaules par forme de risée, & apres qu'il eut passé la veuë par dessus cest aduis, il s'en retourna seoir en sa place, sans dire mot, & le bailla à vn ieune esluenté qui mouroit d'enuie d'y mettre le nez. La compagnie fut scandalisee de ce comportement, & en furent tenus quelques propos: Mais le sage Achior (ainsi se nommoit le Cheualier) appaisa aussi tost ce trouble, & leur fit entendre que telles sortes d'aduis n'estoient que baliuernes pour amuser les enfans, dōt Alexandre le Forgerō en fut fort marry, car il desiroit extremémēt que la seāce se departit avec telle comedie. Apres vn peu de dispute, le Cōclaue se remit, & la chābre s'accoisa vn peu, puis on pria le bon Cheualier de ne pas cōdamner ce diuin aduis sans l'auoir veu tout du long, mais qu'il voulust le considerer attentiuement & dire puis apres ce qu'il luy en sembloit. Achior qui estoit franc en ses actions, comme les anciens Gaulois, n'vsa point de ceremonie, ains reprit librement l'Aduis dont il estoit question, & le leut d'vn bout à l'autre: non sans

s'arrester presques à chaque ligne où il trouuoit des traits de beste & de meschant homme. Or apres qu'il l'eut veu entierement il le reietta sur vne table qui estoit là prés, & apres auoir salué les Seigneurs du Conseil, il parla ainsi, ou enuiron.

Cest escrit dont vous faictes tant de cas, Mes tres-honnores Seigneurs, ne me semble pas si admirable, que vous faictes semblant de le croire, & quoy qu'en die Monsieur nostre Maistre, ie ne trouue pas que ceste expedition de Flandres soit si aisee qu'il nous veut faire entendre. Et quant à cest escrit il ne fait tout au beau commencement, que nous monstrent nostre tort, nous disant à l'oreille que nous deschirons l'Estat, & que chacun nous charge d'imprecations. Ie trouue qu'en cela il a raison, & ne faut pas que vous vous estonniez si ie parle si franchement: car i'ay esté ce matin à la confesse, & ne voudrois pour rien desguiser ce que i'ay en l'ame. Ie suis seruiteur du Roy, & mon Confesseur m'a dit qu'il n'y a point de Paradis pour moy, si ie ne retourne à Paris. I'aime bien de voir l'Estat fleurissant, & les abus corrigez, mais quand ie voy que nous ne pensons plus qu'à nostre bourse, & que nous laissons là le public: par ma foy ie m'en desgouste. Ie dis donc que ce donneur d'aduis n'a rien de meilleur que son commencement, & qu'au reste ce n'est qu'une beste. Il nous parle des alliances d'Espagne & nous dit qu'elles ont tousiours esté funestes à la France, sans nous en monstrent pour cela aucun exemple qui preuue son dire: en quoy il monstre vne insigne malignité, & certes ie le dementirois tout à plat, si ce n'estoit que ie crains de perdre vos bonnes graces en mes vieux iours.

Quant à ce point ie ne m'en foucie guiere, non plus que vous, toutefois ie trouue bon d'en donner permission au Roy, s'il le veut, puis que Monsieur nostre maistre, & Madame sa Souueraineté, n'ont pas le pouuoir de l'empescher. Remettons donc à en conferer à l'assemblée des trois ordres lesquels sous le bon plaisir de leurs Majestez, resoudront s'il y a plus de Iustice de rejeter l'alliance du Roy d'Espagne qui est Catholique, que d'accepter celle du Roy d'Angleterre qui est Protestant: & si toutes deux ne sont pas à desirer pour le salut du Royaume. Pardonnez moy si ie parle avec ce doute, car n'ayant pas l'honneur de cognoistre vos consciences, ie ne sçay pas quel party vous suiuez en l'ame. Pour moy ie vous l'ay desjà dit, ie suis pour Dieu & pour le Roy, quant aux Huguenots ie les aime quand ils sont seruiteurs du Roy, autrement point. Mais pour reuenir à nostre donneur d'Aduis qui au fait de ces alliances a esté si presomp tueux que de les debattre & appeller funestes, voulant par-là reprendre le Roy & son Conseil: ie viens à ce tintamarre qui suit en ce bel aduis, par lequel on nous veut faire croire que nous amassons des troupes en Champagne & Picardie pour aller choquer les monts Pyrenées & secourir les Nauarrois qui graces à Dieu ne sçauent pas encore que nous sommes assemblez pour faire la morgue au Roy, afin qu'il se souuienne de nous au temps à venir. Pour Dieu si nous voulons faire quelque chose ne croyons pas ce ramoneur de cheminée qui nous fait dresser des armées en Mesopotamie pour aller au secours des Topinanbous. Laissons là les Nauar-

rois pour vn autre temps & pensons de faire paix
 & obeir au Roy. Quoy qu'il en aduienne i'aime
 mieux me fier à luy seul qu'à toute ceste assem-
 blée. Pardonnez moy ceste parolle, car il y a ie
 ne sçay quelle amour qui me porte à son seruice,
 comme bon François que ie suis, & si ie n'eusse
 creu que le saint Esprit vous guidoit tous, as-
 seurez vous que ie serois encore à Paris, ou à ma
 maison avec mes enfans à discourir sur ces re-
 uoltes que l'on fait au grand scandale des Prin-
 ces nos bons voisins. Quant à ce qui touche à la
 principale partie de cest aduis, qui fait desjà M^o-
 sieur le Prince, Comte de Flandres, Pour Dieu
 mes amis n'y adioustez point de foy, feu Mon-
 sieur y fut bien avec plus belle occasion, mais
 vous sçauiez que nonobstant qu'il eust grosse ar-
 mée & que les Nationnaires fussent pour luy,
 le Prince d'Orange ne sçeut iamais pour cela si
 bien luy attacher les manteaux de Comte de
 Flandres & de Duc de Brabant qu'ils ne luy
 cheussent des espauls. Il seroit à craindre que les
 bonnets de ducs & de Cōtes, dont Monsieur no-
 stre Maistre vous parloit tantost ne s'enuollasēt
 aussi à la premiere bouffée de vent. Puis nous n'y
 sommes pas appellez comme luy, & d'y aller par
 force, ce peuple est si fait aux armes, qu'il nous ap-
 prendroit nostre leçon, auant que nous eussions
 rangé vn bataillon de piques à l'ombre de leurs
 clochers. Il vous en souuient bien, Monsieur
 nostre Maistre, vous estiez autour de Cambray
 quand pensant prendre vous fustes pris. Et bien
 quoy, ces gens la sçauent ils bien iouir des cou-
 reaux? Alexandre Farnese Duc de Parme estoit il
 honneste homme? Hesdin est. ce vne bonne pla-
 ce?

ce? Son Chasteau descouure il de loin? Qu'en
dites vous? Vous estes braue soldat, ie le veux bien,
mais comme vous nous avez dit en vostre haran-
gue, l'heur ne vous accompagne pas, sans cela
vous seriez excellent Capitaine. Pourquoy donc
louez vous cest Aduiseur qui nous enuoye en
Flandres? Est-ce que vous croyez que nous som-
mes plus heureux en nos entreprises? Mais
vous vous trompez estrangement, car le Sieur
de la Nouë qui estoit pour le moins aussi bon Ca-
pitaine que vous, & homme de bien par dessus
cela, y perdit son latin aupres de Courtray. Puis
feu Monsieur qui valoit cent fois mieux que
vous, car il estoit fils de Roy & frere de trois
Roys, ne courut pas meilleure fortune quand il
eschappa de Dunquerque, avec grand peril
de sa vie & d'aller à fond auant que d'auoir gai-
gné les vaisseaux qui estoient en pleine mer. Hur-
hun, ie voudrois bien scauoir si ce sot qui nous
amuse icy avec ses lanterneries d'Aduis a iamais
forty de Paris, pour scauoir quelle est l'aisiëtte
du pays de Flandres, & quelle l'humeur du peu-
ple. Quant à l'aisiëtte du Pays ceux qui y ont
voyagé ne le scauent que trop, ils scauent quels
marais, quelles riuieres, quelles montagnes,
quels rocs, quelles fondrieres il y a. Les Villes y
sont extremement fortes & bien gardées. Il n'y a
ranparts où les Orgues n'y chantent vn mōter à
la Doriëne. Puis le peuplë y est de tout point sol-
dat, & comme scauent les vieux routiers com-
me moy, il n'y a Curé aux Frontieres à qui nous
n'ayons appris de manier aussi bien vn mousquet
que leur breuiare. Je crois que vous en scauez
quelque chose, car il n'y a personne de vous qui

n'y ait esté ou pour payer rançon, ou pour voyager, ou pour y estre à refuge, ou pour faire quelque ambassade. Disons donc qu'il seroit trop difficile d'emporter piece à ce gasteau sans nous casser les dents, & que nos espaules sont trop foibles pour vn tel fardeau: car d'attendre des forces de la part du Roy, sa Maiesté est trop Chretienne d'entreprendre si mal à propos sur ses voisins; aussi a il besoing de ses forces pour se garder de ceux qui pourroient s'oublier comme nous, ou troubler son estat à nostre exemple. De penser que les habitans des Villes nous ouurent les portes à la premiere semonce que nous leur ferons, par le corbieu nous auons bien sujet de l'esperer car nous les auons tât obligez que rien plus. Il n'y a point de doubte qu'aussi tost que nous y ferons nostre ioyeuse entrée, on nous viendra presenter les clefs, particulièrement d'Ankers où nous auons si bien vescu & sommes mieux morts, & de Mons où nous pensions chanter goguette si nostre mine n'eust esté esuentée. Je vous en parle librement & asseurement comme celuy qui y ay veu autrefois quelque chose. Or de se fier sur la maladie del' Archiduc & croire qu'il mourra bien tost, ce sont des tristes nouuelles pour les gens de bien que ce lanternier nous apporte. Il y a quatre ou cinq ans que ce bon Prince est affligé de gouttes, mais pour cela il ne faut pas croire qu'il soit si malade qu'il en meure. Il a esté fort mal l'hiuer dernier, il est vray: mais le voila à ceste heure remis sus pieds, avec tant de cōtētement de ses sujets, qu'il n'y a personne d'eux qui ne voudroit nous auoir mouché le nez pendant que nous montrons les dents à nostre Roy, qu'ils honno-

rent & cherissent plus que nous. Et puis quand Dieu appelleroit de ce monde ce bon Prince, qui recueille si humainement les estrangers, pensez vous que nous y aurions de l'avantage ? Vous vous trompez mes amis : le pays sera toujours aussi fort, le peuple y sera toujours aussi guerrier, & l'Estat ne se trouvera en rien changé, sauf qu'il aura perdu vn bon maistre. Mais puis que vous m'avez permis de parler librement en ce conclaue, il faut que ie die, que c'est trop d'insolence à ce Heraut qui escrit ces fols aduis, de corner la guerre contre vn Prince parce qu'il est malade & affligé. Il n'y a pas d'homme d'honneur qui approuue ceste procedure, & quant à moy, ie croirois que ce seroit bien fait de châtier exemplairement ce perturbateur du repos public, cōbien que ie trouuerois bon d'yfer de douceur en son endroict de peur que nous ne donnions exemple de la façon, dont on nous deueroit traiter. Ne pensons dons plus à la maladie de l'Archiduc, & ne croyons non plus nostre Charlatan qui nous presche la necessité du Roy d'Espagne ; car les Roys sont toujours Roys, & partant riches quand ils veulent. Il faut que ie vous confesse la verité : c'est, que i'ay souuent pense à part moy, que tant s'en faut que le Roy d'Espagne puisse estre necessiteux, qu'au contraire ie crois qu'il ne le peut estre qu'entant qu'il le veut. Il faut que ie vous ouure aujourd'huy mō cœur, car aussi bien vous diray- ie peut estre l'adieu apres midy : ie dis donc Metaphoriquement que le Roy d'Espagne, au pis qu'il peut estre pris, ressemble au cheual qui ne cognoit pas la force. Ne nous fions pas sur le Tur, car il ne demande que

la paix, (Dieu ayant permis que les mescreans s'appaisent lors que les enfans de l'Eglise se revoltent) & quoy qu'en die ce causeur, c'est vne chose asseurée qu'il a enuoyé depuis vn mois vers l'Empereur vn Ambassadeur pour traiter de l'assurance & prolongation des trefues, & partant la Sicile n'est pas si mal qu'on nous l'a faite. Mais où est la conscience de cest Atheiste? porte il le Turban, ou la Croix, ou ny l'un ny l'autre? Nous sera ce honneur de guerroyer vn Roy Chrestien pendat que l'infidele destruira les autels de Iesus Christ pour dresser à nos portes l'arbitraire estandart de la Lune? O l'infidelité! O l'aduis Mahometan! François où est nostre vertue ancienne! Où est nostre Religion! Mais pour retourner au fil de mon discours, dont ce malheureux m'auoit esgaré, il faut que nous croyôs que nous ne pouuons rien gagner sur l'Espagnol, non plus que l'Espagnol sur nous quand nous ne serons pas des-vnis, & arriere de nostre Roy, cōme nous sommes. Je vous dis encore, ie suis bon François, & si l'Espagnol en vouloit à mon Roy, ce bras tout vieux & descharné qu'il est donneroit encore des bons horions. Il n'y a Espagnol, ny Anglois qui tiēne, ie chargeray sur eux. Mais, mais aussi ne voudroy-ie pas leur faire tort s'ils estoient amis du Roy, ou au moins qu'ils n'en montraissent point d'effets contraires. Ne vous bougez Messieurs: ce n'est rien si nous ne voyôs la fin. Ce donneur de bonne aduenture nous assure que la Hollande nous aidera à ceste entreprise. Pour Dieu ne lay donnez iamais de creance, c'est la plus grosse beste en matiere d'estat qui se puisse voir. Ces Estats de Hollande sont si ia-

ialoux de leur auctorité, qu'ils ne voudroient iamais souffrir qu'elle fust esbranlee. Nous sommes leurs feaux amis, ie le veux : mais pour tout cela, s'ils voyoient que nous approcherions trop d'eux, ils auroient bien tost rompu la paille avec nous, pour se cantonner contre nous. Pourquoi? Par raison d'Estat. Ne sçauons nous pas que le feu Roy nostre bon Maistre & Seigneur a autrefois faict ce qu'il a peu, afin que son Agent eut voix deliberatiue ausdits Estats comme celuy d'Angleterre, & que cependant il ne l'a iamais peu obtenir? Pourquoi cela? Le point d'Estat s'y opposoit. On me dira, mais l'Anglois se fourre bien parmy ces Estats. Il est vray, mais ils voudroient qu'il fust honnestement dehors. Si nous auions eu vn Leycestre en ces pays là, peut estre en seroit il de mesme entre nous & eux, & quand nous y eussions esté, on eust aussi eu de la peine de nous en mettre dehors. Ne craignons donc pas, que ces gens là nous donnent tant d'assistance: car ils voudroient que l'Archiduc ne mourust iamais, & qu'ils n'eussent iamais de pire voisin que luy. Ne nous flattons pas, & ne croyons non plus que le Comte Maurice veuille tât de bien à Monsieur nostre Maistre son beau-frere, que pour l'amour de luy il veuille sortir de la Haye en Hollande: car les Estats qui ont affaire de luy, le diuertiront fort bien de ceste Chymerade, s'ils luy voyoient porté, ce que non. Quant à ce que l'on nous promet l'assistance des Princes voisins qui enuiuent la grandeur d'Espagne, ne nous abusons point, mes tres Reuerends Seigneurs, au Diable si pas vn se bougeoit. Le Roy de la grande Bretagne est si pacifique & conscientieux, comme

nous disoit tantost Monsieur nostre maistre Forgeron, qu'il n'assisteroit jamais yne telle querelle d'Allemand. Et puis, il a tant de iugement & de preuoyance, qu'il nous empescheroit bien d'approcher si près de luy. Il se contente que nous ayons Calais qui regarde son Royaume, sans que nous prenions la peine d'auoir encore Grauelines, Dunquerque, Nieuport, Ostende, & l'Escluse qui seroient autant de busches en son œil. N'esperons donc pas de secours de ce costé là, non plus que des autres Princes qui ont tous de l'intérêt en la despoille de leurs voisins, se persuadans que Dieu les pourroit mesurer, comme ils auroient mesuré autrui. Dauantage ils ont appris que le droit qui est aux armes est ordinairement si tortu qu'ils aiment mieux viure en paix chez eux, que de se mettre au hazard d'estre repris d'auoir assisté des vsurpateurs du bien d'autrui. Je ne dispute pas si nous y auons du droit, ou non, car s'il y en a par dessus tant de contrats & de traitez, c'est à faire au Roy de le quereller, & non pas à nous qui n'y auons non plus de droit que nos Lacquais. Ne nous amusons plus à ces contes de la Cicogne, mais contentons nous de ce que nous auons, sur peine de nous exposer à la risée du monde, & nous rendre la fable des estrangers. Cest aduiseur qui a besoing d'alembic pour espurer son cerueau, nous fait certes beaucoup d'honneur, de dire que la France croyoit que nous deussions surprendre des Villes en pleine paix, & troubler le repos public en faisant la guerre au Roy d'Espagne & à l'Archiduc, sans pour cela (notez cecy) rompre la paix que nous auons avec eux. Je ne

ſçay où ceſt Oiſon bridé auoit le ſens & le iugement quand il eſcriuit ſon aduiſ, Et vous Monſieur noſtre Maïſtre quand vous l'auiez tant exalté. Par voſtre foy l'entendez vous comme vous le dites ? Nenny, nenny, vous n'y procédez pas ſi ſimplement que les anciens Gaulois, auſſi eſtes vous plus fin qu'eux, car encore que ie ſois du nombre, teſmoing ma vieille eſcarcelle qui me pend à la ceinture, vous m'auiez pipé auſſi bien que ces ieunes gens-cy. Mais, baſte, encore va il bien quand on ſe récoгноit, & pour moy ie ſuis d'aduiſ que puis qu'enous vous auons donné credit de nous brouiller, vous l'ayez auſſi de nous desbrouiller, ſans que pour cela il vous puiſſe eſtre fait aucun reproche en voſtre honneur & bonne renommée. Courage donc, Meſſieurs, reprenons le chemin de Paris, car auſſi bien faiſons nous icy mal nos affaires. Croyons ce Venerable Socrate qui nous admoneſte de la part du Roy. Monſieur noſtre Maïſtre eſt de ceſte opinion, nonobſtant qu'il louë par acquit ce beat aduiſ qu'il vous a preſenté pour vous amuſer. Croyōs-le en cela, Meſſieurs, car c'eſt le meilleur conſeil qu'il donna de ſa vie. Crions tref-tous viue le Roy Loys 13. noſtre bon petit Prince, allons Meſſieurs, allons luy faire la reuerence, allons-le ſeruir, car tout noſtre honneur & noſtre bien depend de luy.

Le ſage Achior ayant ainſi acheué, on euſt dit que le Conclaue fut changé en vn tourbillon de vent tant le bruit & le battement de mains fut grand. Tout le monde approuue extremement ſon dire, & iuge qu'il n'y a point de meilleur conſeil que celui qui part d'un homme de bien.

rompu aux affaires, & qui a pratiqué les incommo-
ditez d'une guerre legerement entreprise. Ce sa-
ge conseil fut donc fuiuy, & l'aduis seditieux cō-
damné par Messieurs les Princes, qui se resolu-
rent à vn accord avec leurs Majestez, & quitte-
rent les considerations d'une guerre estrangere,
pour entendre à l'amiable à la sainte reformation
de l'estat, que l'esclat des armes auoit renduë af-
freuse & espouuantable. La harangue du sieur
Alexandre premierement prononcée ne produi-
sit pas vn petit fruit en ceste affaire, car son âge
& son experience apporterent beaucoup de poids
à ses parolles. On l'excusa mesme de ce qu'il a-
uoit loué ce beat aduis, & l'on creut que ce qu'il
en auoit dit, estoit plustost pour esteindre vne
guerre ciuile, que pour dessein qu'il eust d'en fai-
re allumer vne foraine. Ainsi se departit l'assem-
blée, & comme l'heure du disner estoit venuë, on
se mit à table, où il ne fut parlé que de paix, cha-
cun prenant plaisir de boire à la santé de leurs
Majestez, en attendant leur derniere résolu-
tion, laquelle graces à Dieu a esté prise au grand
contentement de tous les François qui voyent
parlà, la France rafermie, & le peuple deliuré
de ses apprehensions.

C I C. Philipp. 12.

Optimus est portus penitenti, mutatio consilij.

F I N.